



PRO SOS GENITORES DE PITZINNOS MINORES

Comente de seguru ischint sos genitores, est importante meda pro unu pitzinnu a imparare sas limbas, siat su sardu (ca est sa limba de sa terra nostra) ma fintzas s'inglesu, su frantzesu e cale si siat àtera limba, non solu pro crèschere sas connoschèntzias, ma ca su bilinguismu (o plurilinguismu) est de profetu mannu pro s'isvilupu de sos pitzinnos. Sa chirca iscientifica est dimustrende chi sos pitzinnos chi connoschent prus de una limba sunt prus abbistos, tenent un'atinu prus mannu pro sas culturas e limbas diversas e pro sos àteros. Duncas, genitores, lassade a un'ala sos istereòtipos sena fundamentu chi narant chi est mègius a imparare bene una limba in antis de cumintzare cun sa segunda ca su pitzinnu si podet cunfùndere! No est beru, antzis sos istùdios de sos espertos de bilinguismu infantile narant chi est pròpiu su contràriu! Assora chircamus de imparare prus limbas possìbiles a sos pitzinnos e de seguru, a mannos, ant a tènnere bonos resurtados!



Ammentade

Imparare duas limbas pro su pitzinnu est naturale, non devet èssere bidu comente un'òbligu ma comente una cosa bella e normale!

Tocat a sos mannos a èssere motivados pro resurtare a motivare sos piticos!



Ite si podet fàghere?

-Babbos e mamas divent tènnere una cumpetèntzia bona (nessi passiva) in ambas limbas chi cherent imparare a sos pitzinnos;

-Devent tènnere un'ategiamentu positivu cara a su bilinguismu, a sas limbas e a sos valores cullegados a issas;

-Non si divent arrèndere cando su pitzinnu mustret dificultade a faeddare una de sas limbas ma tocat de insistere;

-Est importante meda, ispecialmente pro sa limba sarda, sa cumpetèntzia de sos gajos o àteras persones mannas chi podent èssere mastros in custu percursu formativu.



M.G.S.